

Bikote egonkorren erregistroaren antolataketa eta

funtzionamendua arautzen dituen ordenantza

1. artikulua. Administrazio izaera.

Ezkondu gabeko bikote egonkorren Berako Udalaren erregistroak administrazio izaera du eta bertan ezkontzaz kanpoko bizikidetasunezko elkarteak, baita haien iraungitzea ere, inskribatzen ahal dira ordenantza honetan ezartzen den eran eta baldintzetan.

2. art. Ezkontzaz kanpoko elkartea.

Ezkontzaz kanpoko elkartea hau da: elkarte libre eta publikoa, adin nagusiko bi lagunek edo adingabeko bi emantzipatuk osatzen dutena, zein den ere haien sexu orientazioa, senar-emazteen gisako maitasun harremana izanik, zuzenean edo albotik bigarren maila arteko odolkidetasun edo adopzio bitarteko ahaidetasun loturarik izan gabe, baldin eta bietako inor ez badago bertze bati ezkontza bidez edo bikote egonkorra osatuz loturik.

3. art. Elkartze egonkorra.

Elkartzea egonkortzat hartuko da bikotekideak, gutienez, urtebete jarraian senar-emazteen gisa bizi izan badira. Halaber, bien arteko seme-alabarik dagoenean, orduan elkarrekin bizitzea nahikoa izanen baita, edo bikote egonkorra osatzeko nahia agiri publiko batean agertu badute.

4. art. Erregistroko inskripzioa.

Bikoteek, sexu berekoak izan edo ez, erregistroan inskribatzeko eskatzen ahal dute, baldin eta haien adostasun libre eta osoarekin ezkontzaz kanpoko bizikidetasunezko elkartea osatu badute.

Erregistratu ahal izateko, elkarte egonkorra izan beharko du, hirugarren artikuluan xedatu bezala.

Gutienez, elkartutako kide batek egon beharko du Berako udalerrian erroldatua, bertan bizi ohi delako.

Halaber, bi kideek zinpeko aitorpena aurkeztu beharko dute, ez daudela ez ezkonduak ezta inskribatuak ere ezkondu gabeko bikote egonkorren bertze erregistroren batean.

5. art. Lehenbiziko inskripzioa

Bikote bakoitzaren lehenbiziko inskripzioa egiteko, bi lagunek batera agertu beharko dute erregistroaz arduratzen den funtzionarioaren aitzinera, haien artean ezkontzaz kanpoko bizikidetasunezko elkartea osatzen dutela deklaratzeko.

Ez da inskripziorik eginen bikoteko bat emantzipatu gabeko adingabea bada, edo lerro zuzenean odolkidetasunezko edo adopzio bidezko ahaide badira, nahiz alboko lerrotik bigarren maila bitarteko odolkidetasunezko ahaide badira.

Bikoteko batek akats edo anomalia psikikorik badu, orduan ere ez da inskripziorik eginen.

Horrelakoetan, medikuaren irizpena beharko du, ezkontzaz kanpoko bizikidetasunezko elkartzea osatzeko gaitasuna aitortzen diona.

Era berean, inskripzioa ukatuko da, bikoteko bat ezkondua badago edo ezkontzeko gaitasun gabea deklaratu bada.

6. art. Bikoteari dagozkion argitasun eta hitzarmenak.

Lehenbiziko idazpena egitean, bikotekideek beren arteko elkarteari buruz adierazten dituen argitasun guztiak agerrarazten ahalko dituzte.

Orobat, hitzez hitz idazten ahalko dira elkartutako kideen giza eta ondare loturak arautzen dituzten hitzarmenak.

Aitzineko lerrokadan aipatutako edukiak geroago ere inskribatzen ahalko dira bikoteko biak bertara azalduz.

Nolanahi ere, elkartzea bukatu edo iraungitzeko oharpenak egiteko, aski izanen da kide bakar batek hala eskatzea.

7. art. Batera eskatutako inskripzioa.

Ezkontzaz kanpo elkartutako bi kideek batera eskaturik eginen dira inskripzioguztiak Bikote Egonkorren Udal Erregistroan, elkartzea bukatu edo iraungitzeko idazpena izan ezik, kide batek bakarrik eskaturik egiten ahal baita.

8. art. Bikote egonkorraren desegitea.

Kasu hauetan, bikote egonkorra desegintzat hartuko da:

-Kide bat ezkontzen denean.

-Bien artean hala erabakita.

-Bikoteko kide batek bere aldetik hala nahita, bertze kideari modu frogagarrian jakinarazita.

-Urtebetetik gora elkarrekin bizitzeari utzita.

-Kideek eskritura publikoan adostutako kasuetan.

Aipatutako kasu guztietan, bi kideak daude behartuak Bikote Egonkorren Udal Erregistroaren arduradunari jakinarazi eta elkartzea desegiteko eskatzera. Alabaina, kide bakar batek eskatzen ahalko du elkartzea bukatu edo iraungitzeko idazpena.

9. art. Erregistroa Udaleko Idazkaritza Orokorrean izanen da.

10. art. Erregistorako Liburu Orokorra.

Aitzineko artikuluetan aipatzen diren inskripzioak erregistratzeko Liburu Orokorra erabiliko da.

Liburua orri mugigarri, zenbatu eta zigilatuez osatua dago, eta irekitzeko eta ixteko eginbideak paratuko dira hasieran eta bukaeran.

11. art. Oinarrizko inskripzioa.

Bikote bakoitzaren lehenbiziko inskripzioak oinarrizko inskripzioaren izaera izanen du eta horren bazterrean geroago Liburu Orokorrean elkartzeari buruz egiten den bertze edozein idazpen agerraraziko da.

12. art. Erregistroako Liburu Lagungarria.

Erregistroak Liburu Lagungarri bat izanen du, inskribatuen deituren arabera ordenaturik, eta bertan adieraziko da Liburu Orokorreko zenbatgarren orrialdean dauden haiekin zerikusia duten oharpenak.

13. art. Publizitaterik gabeko idazpenak.

Erregistroan inskribatutakoentzako intimitatea, norbanakoarena nahiz familiarena, babesteko, ez zaio publizitaterik emanen idazpenen edukari, salbu eta erregistroaren ardura duen funtzionarioak egiten dituen egiaztagiriak, bikoteko edozein kidek, epaileek edo auzitegiek hala eskatu ondoren.

14. art. Erregistro doakoa.

Doakoak izanen dira, erabat, bai inskripzioak bai egiten diren ziurtagiriak.

15. art. Berdintasuna tratamenduan.

Bikote egonkorren erregistroan inskribatzen diren ezkondu gabeko bizikidetasuneko elkartzeek, ezkontza bidezko elkartzeen tratamendu bera izanen dute Berako Udalean.

I. ERANSKINA

Berako Udaletxean, halako egunean:, honako hauek agertu gara:

Izena:, jaioterria:, helbidea (errolakoa):, adinez nagusia (edo adingabe burujabea, horren agiria aurkezten baitut) N.A.N. zenbakia:, eta izena:, jaioterria:, helbidea (errolakoa):, adinez nagusia (edo adingabe burujabea, horren agiria aurkezten baitut) N.A.N. zenbakia:

Eta honako hau azaldu nahi dugu:

"Ezkondu gabeko bikote egonkorren" Udal honetako erregistroan inskribatu gaitzatela nahi dugula, horri buruzko ordenantzaren arabera, eta horretarako,

Deklaratzen dugu:

Lehenbizi.-Aipatu ordenantzan aurreikusitako bizikidetasuna dela eta, gure helbidea honako hau izanen dela: (oroitarazi behar zaio jaun/andreari T.A.O.L.aren 15. artikuluari jarraikiz, erroldatu beharra duela ohiko bizilekuko udalerrian.)

Bigarren.-Ezkontzaz kanpoko bikote egonkorra osatzen dugula, Ezkondu gabeko bikote egonkorren erregistroaren antolataketa eta funtzionamendua arautzen dituen ordenantzaren ariora.

Hirugarren.-Gure artean ez dagoela lerro zuzenean odolkidetasunezko edo adopzio bidezko ahaidetasunik, ez eta alboko lerrotik bigarren maila bitarteko odolkidetasunik ere.

Laugarren.-Gutako inork ez duela akats edo anomalia psikikorik, ez eta elkartzeko inolako ezgaitasunik ere.

Borzgarren.-Ez dugula nahi/nahi dugula gure arteko giza nahiz ondare mailako harremanen gaineko hitzarmena erregistroan inskribatzea.

Seigarren.-Baimena ematen dugula Berako Udal Erroldan honako datu hauek egiaztatzeko.

Eta zin egiten dugu ez gaudela gu biok ezkontzaren bidez lotuak, ez eta gutako inor bertze inorekin ere, eta gutako inor ez dagoela inskribatua maila eta xede bereko inongo erregistrotan ere.

Horrenbertzez,

Ezkondu gabeko bikote egonkorren Berako Udaleko erregistroan inskribatu gaitzatela eskatzen dugu.

Sin.: Sin.:

II. ERANSKINA

Berako Udalean, halako egunean honako hauek agertu gara:

Izen-abizenak:, N.A.N.:, eta izen-abizenak:, N.A.N.:

Eta ezkondu gabeko bikote egonkorren Udal Erregistroaren antolaketa eta funtzionamendua arautzen dituen ordenantzan zehaztutakoarekin bat, adierazten dut/dugu asmoa dudala bikote egonkorra bukatutzat edo iraungitzat jotzeko, izan ere horrelaxe inskribatua dago aipatu Udalaren erregistroan.

Horiek horrela, eskatzen dut/dugu bukatutzat edo iraungitzat eman dezazuela elkartzearen inskripzioa.

Sin.: Sin.: